

四庫全書

集部

欽定四庫全書

太倉稊米集卷二十九

宋 周紫芝 撰

詩七十三首

次韻呂仁父十九日朝謁初自宮南門

未央宮闕轉光風誰識蕭何第一功
禁殿潮連銀海濶御樓霞似赤城紅
舊來雙鳥飛翻處今在春秋贊祝中
自此翔麟駕君輦試從紫陌看方瞳

月中與兒曹露坐二首

葛巾藤杖竹方牀
旋掃花陰坐晚涼
兒小但隨翁看月
夜長誰念客思鄉

客去無人與對牀
風微聊借月為涼
杯中小友多情甚
勾引衰翁入醉鄉

罌粟將成

庾郎十飯九不肉
家無斗儲飯不足
窮兒朝來忽乍富
墻下千罌俱有粟
只今錦爛花爭妍
想見雲翻釜初熟
一飲醞醕生玉池
再飲沆瀣充朝飢
味雖似淡中實美

暖能扶老甘歸脾黃梁歲割一萬斛謾飼穀伯如猪肥
君不見蛾眉仙人家海涯自種紫芋羹蹲鴟尚說人間
無此味天酥酖固不可知願借東坡玉糝句題作此窓
罌粟詩

小兒燈下讀細書戲作

一生青白強錨銖老眼昏昏亦廢書長劍竟辜真事業
短檠空照舊蟲魚臨風忘酒殊妨事隔霧看花不管渠
猶與蠅頭較多寡小兒曹合戒前車

次韻鮑仲山官居臨大池傍鮑題以協趣取謝
宣城所謂後協滄洲趣之句也

參軍詩古清而臞清瑤繞屋分西湖長安城中開八陌
心知此地人皆無草閣波平少傍舍卧看晴沙鳥飛下
眼無公事兒自癡句有澄江官頗暇吾生已老心懷羞
為飢索米亦有求聞君稍動謝守趣令我轉憶江南洲
詩成況復終少味五字故堅不知畏可憐未識故將軍
應似當年灞陵尉

次韻仲山再示協趣韻

青衫老吏骨亦臞身游魏闕心江湖眼看白髮不勝數
夢繞故鄉何日無況我携家得官舍背水開門故墻下
不見湖光意闕然欲喚歸舟心未暇一聞羞處令人羞
人生如此當何求春動飛來屬玉起無人貌得河中洲
闕二字 嚼蠟元無味鮑謝詩高心獨畏西風長怨草蟲秋
自笑酸寒溧陽尉

次韻仲平喜雨二首

早欲流金水欲裂百千火聚作此熱秋風忽送雨一犁
應念田夫汗流血廟堂調燭隨弛張五色線補虞帝裳
書生擬作豐年頌臨窻弄筆鬢如霜

田作何郎炊餅裂飲冰不救中腸熱千山雲路鳥欲飛
六月行人駒汗血風師偃旆那復張雷師鞭雨沾帷裳
雨中彷彿雲子香行看玉粒秋飽霜

題蔡仲平博士行田記唱詩軸

當年車騎兩聯翩來按鍾陵水復田可但癡兒了公事

尚餘詩思入風煙

令君頗似太邱賢
水旱憂君記昔年
父老猶能談舊事
想隨佳句共流傳

次韻孫子紹判院喜雨之作

豐隆欲鞭車風伯
不惜使我欲訟風
伯雲意亦復變帝
命誰敢遲民事那
可緩油雲始膚寸
崇朝忽瀰漫深憂
軫淵衷凍雨洗霜
霰知誰挽銀河傾
瀉落天半喜氣同
雨來孫郎語良健
應憐占籍者就食
免流轉天子坐法

宮斯民樂芳甸雲山尚可尋野水不辭亂幽人得新涼
妙作寄三嘆君鋒不可當我復那能殿

錢塘初見黃爵

儂家大江東黃爵家江西江東黃爵不忍喫江西黃爵
賤如泥赤罌封口上有印白綿卧酒中含脂君不見浯
口漫郎真漫仕萬事平生不如意一囊紅粟不一咽千
里苞苴誰復寄有時鮭菜念故鄉并刀落膾思飽霜青
龜未堪聊入俗黃爵那知亦渡江時平漫說爾可咀擊

鮮誰遣今得嘗殘杯欲盡客欲去臞雁烹魚豈論此酒
聞風味不可名惟有此郎難著句九原誰喚僊耳翁添
入當年老饕賦

花次元嘯齋

手種琅玕歲已成要聽風雨近窓鳴戲將落月千尋影
幻作長離半嶺聲蕙帳夢殘秋雨急錦囊詩了夜燈清
便須寫入朱弦曲安用能回越石兵

七月二十日秘閣曝書二首

芸香時近曝書筵
縹帙絢囊得縱觀
不是聖時修故事
豈知藏室有清官

香羅剪帕金描鳳
紅字排方玉作籤
身到蓬山瞻御墨
眼驚奎宿射珠簾

題徐季功畫墨梅木犀二首六言

夜色無人能畫徐
郎挽上寒枝彷彿
孤山盡處黃昏月
到花時

細雨欲催秋晚幽
花已著寒枝似我
江南九月西風馬

上歸時

題徐季功畫二古木二首六言

千尺龍蛇天矯半山風雨憑陵誰為梅花賦手能回古
木寒藤

何處千年雙榦未嫌雪虐風饕楚士兩龔介潔孤竹二
子清高

剪蘆藩出木犀二絕

小窓幽絕為誰通分得清陰落坐中可笑森嚴木居士

肯來相伴竹坡翁

特地移藩喚木犀
眼明初見歲寒枝
臨風想像香來處
不到黃昏滿樹時

題王季共蓬齋

小結茅廬寄一椽
夜燈聊與客周旋
聞知急雨來何處
題作蓬齋亦偶然
政欲搔君江上寄
莫嫌驚我醉中眠
老翁辜負漁竿久
何日煙蓑上釣船

次韻子紹游壽星寺寒碧軒

好竹連山萬壑青，落星天近接飛甍。
流盃共把人須勝，風玉相看眼倍明。
故老舊遊雲已散，孫郎長嘯鳳重鳴。
閒來却倚朱欄看，蒼雪依然入句清。

東坡題寒碧詩有
紛紛蒼雪落夏簾

之句

別方桐川

一麾投老始專城，共理聊煩助聖明。
欲識斯民之不病，要知循吏本無聲。
官閒莫道州如斗，客滿何妨飲似鯨。
它日桐川樓下酒，會須分與故人傾。

秋懷二首示陳李二省曹

客枕難禁夜醺樽不解愁秋聲歸草樹霜力到衣裘依
約江南夢留連海畔州君休問新句只有大刀頭

二

細數平生舊誰人到白頭飄零無藉在生死任羈愁太
白今詩伯元龍昔勝流吾衰已如許何得奉君遊

次韻李郎中休日不出二首

文昌不作吏曹忙賜沐歸來日更長青士寒生庭下雨

木奴香借樹頭霜
喚回短夢知何事
尋得新詩又夕陽
遙想南窓卷疎箔
起看雙鷺入鸂鶒行

薄鴿癡兒作底忙
閒中得味獨君長
登臨莫負山如玉
歲月還成鬢作霜
誰把酒澆陶靖節
天將詩付沈東陽
明朝湖上看雙壁
兄弟聯鑣作雁行

次韻楊吉老秋懷古風

相思復相思
一別遽如許
相望隔參商
相期邈秦楚
邈
泗願從之
道路長且阻
道阻不足憂
歲暮心獨苦
踏車

縱絲娘頭緒幾千縷寒蟬聲酸嘶入我肺與腑自我之來
思悠悠六寒暑賴此同社郎清風生玉塵

送馮清叟使北三首

上盡西湖幾翠峯偶依征驛度邊風遙知載酒尋山句
盡入彎弓落雁中

君王慈儉不臨戎國好長因漢使通遙想南歸寒已盡
榆關草色正春風

黃雲朔雪馬凌兢去踏河邊六尺冰博望封侯君亦喜

歸來洗眼看飛騰

實錄院與道山隔牆堂後修竹僕飲餘必曳杖
婆娑其下時聞奉常閱樂之聲故詩中有雲
韶之語

風條無葉自蕭騷玉立修篁不受凋咫尺蓬瀛橫雪觀
依稀絲竹度雲韶天憐人老悲雙鬢官似僧閒占一寮
日日杖藜摩飽腹未知何以答清朝

次韻王參猷用前韻見寄

文字何當僕命騷餘年雖在鬢全凋元無舊曲能三歎
為借新章作九韶千里奉祠猶去國一官何地可同僚
吹噓直上青天去誰挽斯人入聖朝

謝曾使君惠丹邱集

舊說江西一派禪公家得法自當年回風流雪何人似
寶鉢天衣幾世傳後學安能窺制作老夫猶喜奉周旋
寒窓讀罷無人語只有燈花欲鬪妍

題吸川亭

三峰擁中州二水俱北匯狀如吸川鯨有屋負鯨背主人頌酒德量與劉阮對會令百川流入我三尺喙回視瓮間人無乃真鼠輩天風駕鯨波風靜水可愛想當持翠螺時依太白酌爾曹固何知此意有君在

題控鰲亭

神仙邈何許彷彿在中天弱水不可渡况乃風引船六鰲戴三山來此知何年上有百尺樓縹緲翔飛煙平生持巨釣一舉遂可連以手控六鰲于此相周旋可恨世

俗眼未識方壺仙絕境不可到望望空惘然

次韻劉尉雪後東岡尋梅

雪壓東岡千樹梅忍寒誰肯為渠來却愁花底人如去
羞得南枝不敢開

贈趙德莊

赫奕宗枝秀稜層玉樹新相逢又殘歲話酒幾青春病
不妨詩否家應入望頻少寬歸去日去別易愁人

時宰生日詩三十絕

某嘗謂人臣而位極宰輔固亦足矣然而苟
無功德足以惠利而流傳後世則雖尊位重
祿足以超冠百僚使人歆艷以為一時之榮
可也至其道德之不聞功烈之不著徃徃為
人輕鄙姍笑無所不至蓋公議之所在有不
可掩者當如是也夫庸庸者固不足論間有
盛德大業足以自表見於一時者則當時之
人紀而書之後有作為詩章以歌咏之騰之

衆人如出一口蓋公議之所在其不掩者亦
當如是也五帝遠矣三代於周為近三百六
篇可考而知在文成王時則有若太公望
周公旦召公奭在宣王時則有若樊侯仲山
甫是數公者皆有歌以美其功德太公之詩
不多見微繫其旨於大明其辭曰維師尚父
時維鷹揚周公之詩七月二篇公所自作及
遺成王東山而下則專美周公之詩也召公

之詩有十四篇皆美召南之治而已而鵲巢
甘棠行露則為美召公之詩也其後周平王
之元年衛武公兵佐周有平戎之功烈乃命
為三公且使入相於周詩人作淇澳之詩以
美之又其後則有若鄭之武公與其父桓公
皆有賢德而並為周六卿司徒之官詩人作
緇衣之詩以美之又其後有若魯之僖公亦
有賢德詩人四篇以美之此二三公者未嘗

為周轉相不過為司徒之官與一國之君耳
然而猶皆有詩焉周公大聖固所不論若太
公之為師武公之為相皆於兵有功於王室
餘不過聽訟斷獄好賢樂善寬儉愛民是皆
一功一行形於歌謠者然耳未見其卓然大
功非前世之所常聞非後世之所可及如吾
太師相公者也今公以道德為天子之宰以
儒術為一世之宗以堯舜不戰之兵而定亂

以成康禮樂之治而化民神功妙用超冠今
昔書契以來所未前聞也觀其真誠一德上
契天心忠言嘉謨下符主意陰功仁澤旁及
羣生能使兩宮相見宗廟再安回累卵之危
成泰山之固疑若出於神授天與非人所可
得而窺測者矣夫傳紀武公年踰九十詩祈
魯侯萬有千歲夫以區區魯衛之君猶得國
人頌願之詞若此其至是宜風誦章句之流

皆願作為歌詩以祈吾太師相公無窮之壽
以為社稷生靈酬報功德之萬一也然則圖
章疊句溢篋盈囊汗牛喘馭萬益而來殆不
足以怪其多且至也今百執事之列如某之
職疎而伎小文鄙而辭陋固不當自效一鳴
以干僭越犯分之誅竊嘗怵惕而恐俯伏以
思粵自歲在壬戌則嘗作歌詩與太師父老
鼓舞堂下謳吟於九達之達而公亦俯而能

聽矜而能容未嘗有一言以督過之則某今日之詩亦若可以復進於鈞庭之下矣況今黎庶乂安朝廷無事年穀豐衍星宿清潤而月在嘉平將興嗣歲日景晏溫頌聲洋溢此皇天眷佑有宋是生賢佐之辰聖天子嘉景運熙洽之隆圖師臣眷遇之寵錫之燕喜恩渥有加玉醴天庖來從帝所鈞天廣樂下奏私庭宜有詞臣博士太史獻詩作阿衡佐商

之頌草山甫崧高之雅而區區之言尚敢以
為獻實以至和之澤均被含生雖龜鼃之蟲
亦將鼓翼鳴脰而不能自已也小詩之三十
章姑以伸頌願之情而已倘欲敘述功德之
美載之簡冊之間雖累千萬言而不盡也况
於八百有四十言乎謹序

從來建鄴是王都天產皋夔為帝謨可笑晉人無眼目
渡江惟笑見夷吾

繡袞貂冠舉世榮
陰功難報本難名
令公清德流無盡
依舊秦淮繞故城

秦漢功由百戰成
廟堂何代不談兵
凌烟閣上從頭數
誰解垂衣致太平

向來諸將各雲屯
一折渠魁世自分
但見鷹揚稱尚父
不聞跋扈有將軍

梯山蕃使入疆頻
歲捧瑤觴奉至尊
申觀萬年方祝聖
王春正月更朝元

萬騎邊聲久不聞
蓬萊宮殿日長春
君王勤儉無行樂
閒作宸奎賜近臣

黃帕蒙羈御坐來
臨戎久不按龍媒
內前沙路平如掌
玉輅觀成試輦回

紹興天子聖神孫
明道宣和典故存
曾與諸生迎御輦
又瞻青耜載耕根

當年輪奐落成均
法駕天臨近至尊
萬國儒生瞻聖化
一聲清蹕在橋門

天祿初成幸翠華
隆儒恩意日尤加
只應東壁圖書府
便是瀛洲學士家

仲春之日祀高禩
天仗親臨曉霧開
壇下百官稱賀了
鈞天聲裡帶花回

雙闕傍邊是玉津
禁園花柳一時新
東游原上無行幸
分作慈寧殿裡春

誰移蓬島在人寰
詔賜新居五百間
紫塞無兵清似洗
丹樓不動屹如山

御墨親書六字牌閣名新賜屬元台內前夾道爐煙裡
爭看翔鸞舞鳳來

御府分香壽老人紫皇親賜玉壺新聖恩無極年無盡
恰似長生殿裡春

大事因緣意未深知公濟物自初心聊將石室巖前雨
來作商家早歲霖

一語能平百戰塵兩朝赤子盡歸仁十年困卧邊亭鼓
同祝公年是幾人

南北交歡萬國寧不將黔首比金縢時人未會新盟意
要與思陵作中興

時相論功固自賢真儒一出定千年能回鑾御歸長樂
何止龜陰得舊田

北海來歸幾過年朱顏依舊照貂冠不將一節更夷險
誰解如公耐歲寒

知公清德自天然猶復遊心到簡編應笑向來張相國
後堂賓客少彭宣

黃金新鑄景鐘鳴公作銘詩紀告成從此聖朝郊祀典
文章無復數西京

袞衣調鼎春光軒經術傳家侍禁筵試問一門三畫戟
何如隔座兩貂蟬

四海文衡孰主張半隨西路擅詞章三君八俊今何處
知有宗師在廟堂

太平和筆一番新瑞表丹邱亦異聞不遣楓榆作連理
誰知六合已同文

葆旅占星固異常
閩山竹秀米千囊
天公已遺鸞鳳食
便恐雙飛入建章

胸中治國計誰良
只有休兵是秘方
肯為八荒開壽域
能仁須號大醫王

住世神仙五百年
長生東出笑談間
不從方士論爐鼎
自有陰功解駐顏

帝城春近俗熙熙
師宰功高不事知
天上中人傳詔日
御前蕃使賀年時

歲抄四絕

湖上青山一水邊
暮雲樓閣九重天
春幡影裡迎新歲
爆竹聲中送舊年

天寒細雨還成雪
日暖晴雲却護霜
可惜梅花殘臘月
十分天色似江鄉

此生無事不隨緣
世路何心更著鞭
年盡未歸春偶爾
春來若健亦欣然

端門行欲賀新元
竊食無功只厚顏
可笑腐儒黃卷客

亦隨朝士紫宸班

太倉稊米集卷二十九

欽定四庫全書

太倉稊米集卷三十

宋 周紫芝 撰

詩五十四首

虛飄飄

并序

元祐間山谷作虛飄飄蓋樂府之餘當時諸公皆有和篇戊辰臘月二十有八日夜讀淮海集見之亦用其韻羞狗尾之續貂於顏有覩悟白駒之過隙與世亦踈庶幾見者不我

誚焉

虛飄飄虛飄飄姮娥臨月榭
神女渡仙橋風撼花浮水
霜吹葉落條飛雲轉眼下
三峽密雪滿空來九霄虛飄
飄虛飄飄比人生命猶堅牢

虛飄飄虛飄飄水邊看海市
雲際現天橋弱柳綿吹徑
嬌花錦綴條卧雲雌霓^聲入飲
滄海過眼夕陽低碧霄虛

飄飄虛飄飄比人生世猶堅牢

戊辰除夜四絕

千里家山一望間
白頭夫婦且樽前
詩中游戲無三昧
客裡光陰又一年

七年長夢採江離
此夜樽前倒接籬
莫問年來何歲

原闕

新春皓薄曉鐘聲
殘燭晶熒守歲檠
年向白駒光裏度
詩隨藍尾酒中成

立春前五日史館對雪二絕

九天飛下玉花繁
喜入長安十二門
獨醉且須溫臘酒
迎新又欲帶青幡

昔年蹤跡寄江頭
雪屋梅村自一邱
醉裡却疑身是夢
爛銀樓閣看瀛洲

韓信

韓信功高世共知
區區安用假王為
固應漂血長安日
已在滎陽躡足時

范增

西楚興王亦有人
半扶炎祚作謀臣
老生不解歸明主
事去方知是失身

次韻子紹立春二首

自息中山鬪長安幾見春司天得南正迎日法高辛送

老年華速催耕雨意新又聞寬大詔飛舞下天津

東漢故事

立春日下

寬大書

客久悲殘歲春生尚薄寒簪花人似夢卷白意先闌黃
犢還驚眼青頰已入盤新年有行樂老去逐君難

聞西湖梅盡桃花已有開者

不到西湖忽換年今朝欲掛杖頭錢催成柳色多如許

落盡梅花最可憐

日日湖邊踏淺沙西湖久住已成家
劉郎去後空腸斷憶著玄都觀裡花

送葉泉州二首

近日泉南守新除武部郎漢廷多長者
循吏得惟良海國蠻珍聚兵厨臘酒香
不妨聊卧治未要薄淮陽

二

天上星郎貴人間五馬榮倒樽知客滿
閑閣自詩成閩

嶺千山隔吳船一水輕九重宣密詔何日問歸程

送馮均州二首

聞說京西道均房虎更多定須歎來暮政欲飲無何過
客虛厨傳飢氓費撫摩君看歸諫議為郡拙催科

二

從事持三尺將軍控萬弦廟堂應記憶江漢久流傳又
復分新壘歸來更幾年他時休怪我今日自華顛

寓宿省直有懷方元伯

古屋頽墻久寂寥
寒廳依舊長芭蕉
主人應在花深處
獨對東風醉小橋

次韻子紹題竹坡二首

寓舍有短坡植竹其上
子紹榜曰竹坡因自題

曰竹坡
老人

孫郎忽唾寒窓玉
來過當年玉川屋
更作縱橫一尺書
為榜南坡兩三竹
結廬歸卧今尚無
白頭寄食猶中都
移栽自種短墻底
他時此計知何如

次韻李共月夜見懷竹坡用子紹韻

五十九年遽伯玉家無擔石居無屋喜君馬上風前詩
似我南坡月中竹寒窓有意過我無雍容車騎子甚都
更當為作子虛賦王郎文彩今相如

次韻季共再賦

烏衣諸郎美如玉笑我秋風卷茅屋才高渠是判花人
頭白吾羞汗青竹此君那可一日無桃花不復怨玄都
得公明月千斛珠我羞魚目真不如

次韻季共再賦

無方可試藍田玉空想雲菴卧玉屋賴有人間百尺樓
下臨此地千尋竹衰翁久已一故無聊睇逸驥方過都
公是風流小摩詰我為無用長僑如

次韻季共再賦

鉛刀不可切堅玉敝筐豈能持大屋強驅跛鱉當前鋒
看公詩成如破竹君房言語舉世無射策未許蒙帝都
巴人下里不足數雲韶九奏方純如

次韻季共再賦

蘊石知公似荆玉誰作璵璠薦王屋白髯應笑虎頭癡
青衫謾把魚須竹老此安能為有無曹會豈可當大都
彈丸脫手盤走珠句然如此今誰如

次韻季共再賦

平世欲獻初無玉何嘗生存夢華屋苦遭田父亦與飲
不問主人時看竹十事如意八九無暮年猶喜見子都
那能從公得三絕但可一身觀六如

次韻季共再賦

鱸魚憶鮓松江玉船作浮家當漁屋寒窓夢著雨中蓑
長釣復垂波上竹平生僅識之與無敢攻詩城跨二都
歸舟欲上知可呼念捨公去何所如

次韻季共再賦

公哦新詩戛鳴玉欲辦陟釐須滿屋誰遣藍田邱壑人
來吹緱嶺參差竹心知遊路豈復無頗如六鷁飛宋都
小巫羞澁見大巫神氣比公真蔑如

讀婆娑集書其後

早緣文字得聲名佳句流傳益可珍
讀到青蒲當日疏
其他猶可是難能

寄幼安使君

平生清德畏人知豈弟真宜作吏師
日飲無何方得計
民歌來暮却成思何妨道守催科拙
自是穰侯見事遲
天與一窓供燕坐
烏墩山好助公詩

食回魚頗念河鮑戲作二詩

蟠腹鱗鱗品自珍
紅鮓浪欲與爭新
世間那有西施乳

寧有河魴解藥人

蘆笋初生水繞村河魴旋煮薦清樽十年不踏江南岸
楊柳飛花欲斷魂

已巳寒食

七度逢寒食連年客異鄉鬢絲嗟老大冢木念青蒼亂
眼花無數傷心柳著行病餘春又過不擬近林觴

次韻庭藻韓園燕集

故老歸來有喬木更結飛樓繞湖綠城南去天無尺五

中有人間幾巖谷
驂騑曉踏金谷園
花邊立馬絲竹喧
金屈卮行碧落酒
繡羅襦醉雙紋
鴛鴦吳姬遺鈿客
墮幘白眼舉觴天
宇窄春深別館花
如烟藉草傳杯地
為席君居當東我
復西莫嫌酒浣身
上衣遙知第五橋
邊路桐葉題詩人
未歸明朝雨驟風
苦惡殘榼雖存不
堪酌更須拭眼到
風篁急呼海棠償
舊約

再和庭藻韓園之作

雨後斜陽亂森木
湖上山青河水綠
將軍一色種桃花

錦帳紅絲裏山谷人生莫愛歸田園結廬人境無人喧
何如功成銷金甲雨中看浴銀塘駕長安黃塵沒烏幘
歸來橫改一窩窄何如載酒作醉眠田父時來與爭席
春風欲起春日西花下跨鞍花滿衣恨無龍眠老畫手
寫作諸郎聯騎歸竹坡有酒亦不惡客無可人時自酌
君憐羈客倘見呼來歲西歸有新約

題陳公悅足軒

飢人未食長流涎芋魁作飯腹果然八珍九鼎紛滿前

鼎中一臠不下咽吐而去之惟欲眠貪夫嗜利絕可憐
牙箸落手喜若顛家有窟郎無數錢跨州連陌空多田
千頭萬尾不當緣高臺未傾金碧鮮客食不下日十千
棄禍忽起踵復旋利激奴輩非關天太邱諸子圖畫傳
元方季方兩聯翩元也作詩如湧泉高歌大笑傾四筵
只今為郎近日邊季也勇退高騰騫結廬庇雨無餘椽
栽花移竹今幾年種穀只取田一廛鷄肥酒熟客可延
人生安分作當捐眼前取足須隨緣倩營菟裘將老焉

伯氏欲掛神武冠歸作兩翁相對間政看寶帶黃金懸
未可便情詩盟寒

王元道剪牡丹見餉二絕

知君流落在天涯八節灘頭憶舊家想對東風開病眼
幾行和淚洛西花

已是飛花落絮天東風猶入竹坡寒綠樽恨我無醇酎
紅艷煩君送牡丹

次韻林梅卿西湖載酒時僕以病不赴

西湖豈復似人間付與瀛洲學士閒
百榼滿傾桑落酒
兩高聊作道場山
一年春事方三月
萬里風煙靜八蠻
白髮可憐歌病枕
蘭船空憶棹歌還

馬山觀道傍賣芍藥口占

沙河簾幙近蒼閨
芍藥絲頭十里風
誰道昇平本無象
江都花是舊時紅

次韻陳彥育諸天閣晚眺

飛閣青雲上何因
一笑同春歸
憐客去酒聖與誰中相

國名猶在唐朝事已空更將詩說夢強欲付衰翁

次韻子紹送春七絕

混沌七竅鑿可恨條與忽人生寒暑間萬古長出沒

二

孫郎惜春句平澹古未聞譬如春江波因春自成紋

三

來禽着青子紅葉護殘春但使風味勝不愧桃李門

四

微生感年衰誰能惜春盡政恐厭黃梅吳楊出蒸茵

五

西湖天下勝咫尺安得往青春不可追老力亦難強

六

招提在南山共著蠟屐登世無謝康樂此事誰復能

七

青春不識回豈但春去閒何以永我日妙香橫博山

送喬郢州

使君雙旆擁朱轡竹馬先迎近郭春且聽郢人歌白雪
莫因騷客念東門新詩為我應須寄往事知誰與細論
喚取莫愁烟艇子有時來伴石頭樽

次韻章季常飲冰長句

九衢烏帽吹塵沙心知痼疾無烟霞病眼不禁書葉遮
歲月逝已空吁嗟故鄉日遠老日加無地可種青門瓜
綠蒲朱籠來邇遐揮金截玉爭矜誇御府詔賜珍復嘉金
盤璀璨無疵瑕章郎文采如景差便恐餘子俱公邪故

遣麗句開天葩語勝未必甲豐華深山窮谷寒無涯一
讀盡噤池中蛙老人晝卧橫烏紗舉杯隨分浮水花飲
甘欲借歸齒牙千金難買官焙茶百金未盡先藏叉用賈
語 耘老

染衣亭 馮敏叔家

聞說郊居勝新穿五畝池暗通山窈窕深住碧漣漪驚
起紅鷗鷺吹翻綠荔枝雨添衣色秀波渡襪塵遲照眼
誰重唾臨流自可詩水清魚莫種秋近荻須移剩欲添

風月何妨更渺瀰却憐韓吏部埋甕作癡兒

玉井橋

馮敏叔家

水滿雙鴛沼花開玉井蓮亭浮幽渚外人渡小橋邊白
羽參差在跳珠次第圓風高與芬馥露重借嫣妍青板
釣魚老朱欄聽雨眠時從客容與寧借鷺聯拳何日回
征棹歸來賦短篇共邀池上月同看水中天

次韻伯遠端午日拜碧香之賜

紫府琬腴照玉壺來霑隱吏北山隅遙知拜賜瞻金闕

應笑流涎濕頰醉面看君紅作頰衰顏憐我綠凋蒲
明年何止分瓊液細葛香羅世亦無


次韻仲平去惡木葺新軒一首

自我來東吳竊食偷燕閒頽檐賦官居漏雨穿屋山有
如胸臆蟲盤屈沮洳間入門兒女愁出門車馬喧年來
得新巢易地稍立言短牆蓬蘽蒿頗亦費剪芟視公有
華屋未敢窺其藩惡木屏除翳雲山借空觀郎曹二三
公相過綴遊觀清吟屢刻燭夜語常更端但恐陳太邱

開窓納晴川定復譏中郎寸碧瞻孱顏兩家合爭雄人
物俱翩翩不如醉明眸墮馬傾低鬟付此百年事試作
一笑看我如雲水僧故鄉未言還安得從杖屨婆娑共
躋攀

晚集江園會者五人黃叔魚林平父黃文若刁
黃叔與僕也以暝色帶飛鳥為韻余得色字
少小謀一邱老大猶未得幽園固佳處入眼自歎息賴
此千載人相逢共京國追涼坐花陰持杯飲湖色斜陽

入疎林晚色忽復逼忽忽行語離兩別遂南北日落未
可歸山高更須陟佳會豈易逢尊鱸不須憶



太倉梯米集卷三十

欽定四庫全書

集部

太倉稊米集卷三十一
四至

詳校官庶吉士_臣李如筠

主事_臣呂雲棟覆勘

總校官編修_臣倉聖脉

校對官中書_臣高中

謄錄監生_臣范鳴謙

欽定四庫全書

大倉稊米集卷三十一

宋 周紫芝 撰

詩三十九首

次韻徐伯遠題錢少愚畫孤山月梅圖

錢郎名與大年齊貌得孤山一段奇
月色昏昏人寂寂

梅花淡淡水漪漪戲將三昧傳神手

東坡有趙昌花傳神之語催動

千林破臘枝不用摩挲窺妙墨暗香疎影在新詩

次韻仲平示曾庭堅侍御

曾侯為生蘆易足天與一居山繞屋看山有味聊與娛
嚼蠟無情本非欲子建波瀾今尚存斷弦那用鸞膠續
會當踏月夜相過曳我江心舊桃竹

次韻季共古意三首

艷女塗修眉貞女重婦德紛紛桃李花豈復無顏色爭
妍固可憐落知不足惜我欲採江離悵望秋水隔

二

人生結綢繆捐情誓蒼旻恩愛那得長故交不如新踰

蹬迫歲晚坎壈悲斯人舉世亦何有知心繫夫君

三

客從遠方來獨立江水湄江水何悠悠白髮空離離病足修長途弱羽思歸飛歌君傷秋曲淚濕遊子衣

袁時良霧隱齋

袁侯家多文頗似班叔皮厥後有仍雲文采如當時流風今尚存所恨世未知一官事拮据相處似未宜西齋附寒廳花竹搖風枝惟因有餘日隱几哦新詩願君掃

秋茶決獄稱吏師何必大門閭可使高軒馳會當專北
門誥命司文詞斯文可華國當代稱羽儀他時豹一斑
寧須管中窺時來固有待道在亦可斯只今坐寒窓相
從歎兀誰聊呼管城輩文字相娛嬉

王興周以蘇養直詩見借今日偶携至直舍且
誦且已自喜亦自笑也為題三詩因效其體
江湖久入平生夢猿鶴空懷老去羞輸與蘇郎門日月
小舟長繫白蘋洲

身如倦鳥欲歸去盟與白鷗真復寒更把後湖風月句
着官仍對吏書看

有樹移雲盡欲平牙籤卷盡俗塵清誰知吏案文書裏
時有滄江風雨聲

次韻子紹秋熱憫雨之作得詩而已雨足故詩

意小異

我欲蓐收回老火乞雨天公殊未可忍飢但復念壁立
回首誰能看甌墮天將夜雨送秋來可近書檠吾已惰

耕犁澤澤水涓涓歸買一廛猶不果老翁何日在田間
君上青雲應記我

次韻庭藻兄弟唱酬之作

黃耳書來得近詩楚騷寧復為秋悲會令好句能傳信
更有何方可樂飢巖壑樹高元是桂階庭人秀盡成芝
脊令風雅誰能繼神物應須與護持

夜聞潮二首

江隔西興老翠鬟轉頭即是海門山八盤嶺下移家住

安聽潮聲到夢間

春雷隱約地中鳴
慣聽由來夢不驚
莫怪詩翁歸未去
故鄉無此海潮聲

次韻仲平太博中秋齋中對月二絕

秋蟾此夜一盤明
影落齋壇分外清
想對風光無處說
夜深聊復以詩鳴

軟紅堆裡十朱輪
此地何嘗有一塵
月亦憐君最孤絕
故來相伴作詩人

次韻仲平十七夜太社行禮月色如晝

從來方社要齋明
玉豆精華酒潔清
風裡笙簫雲外至
耳邊環珮月中鳴

龍輶來下未為輪
九奏迎神不動塵
想得椒漿初奠後
夜歸猶有月隨人

九日不出鄰牆木芙蓉盛開

九日無行樂
何人慰獨居
擬翻金潑灑
聊醉木芙蓉
秋與愁相似
花應意不疎
衰顏誰復管
薄艷更憐渠

九日竹坡晝睡二首

紫萸香度酒杯空，分付重陽一枕中。老至上山無脚力，

試憑幽夢到南峯。

前此小兒輩欲上山高，不果期以九日又不果。

近籬青藥欲成金，料理衰翁伴醉吟。醺醖偶從天上得，白頭還對竹坡斟。

十日雨中對花

客有誰持酒，花猶解過牆。西風吹盡幕，細雨濕紅妝。此地當愁眼，回頭隔異鄉。幾時歌醉帽，一朶薦重陽。

九月望日月色如晝

靜坐無人鵲轉柯
冷蟾分影照金波
月如白玉盤初掛
天似青銅鏡始磨
正好中秋無此色
不知今夕定如何
錦袍太白憑誰問
應趁春風上大羅

九月二十四日試吏省舍雨中獨坐終日是日

誦阮嗣宗秋懷十七首因效其體

素秋倏欲杪
鶉火亦已中
霏微值零雨
黯淡悲西風
出庭落葉下
古木寒條空
何年琢翠巘
洞穴窺玲瓏
歲久

人跡絕亂石擁前峯稚松絕可憐崛強榛菅藂但恐歲
欲晏霜雪日夜濃物理有變滅人生苦龍鍾異哉清切
地茲焉得從容聊為商聲謳獨和寒窓蟲

次韻仲平祠宮書事二首

月黑祠宮夜天寒誰與偕遂聞宣室召先遣太常齋勝
事詩能說牢愁酒可排明朝看方朔割肉更詆諧

二

秋晚催年急愁多與病偕客塵游淨几落木下寒齋吏

部詩如許衰翁老易排無心羞闌草有句似俳諧

次韻仲平種金橘

黃落江南盡蒲柳金橘可曾眼中有頻年慣見小阿奴
萬里來從洞庭口吳中夏果爭團圞楊梅五月紅欲然
后皇佳樹最晚出蒼柯密葉垂青圓萬物因人作輕重
玉食供王當有用瑣才誰綠荔枝奴

龍眼號荔枝奴語在本草

結綬

彈冠必王貢驛使飛來無此實吾皇盛德如帝乙正林
桃李知幾何草木簿中無品秩山中移栽初種時妙手

封植公所施他時餉我三百顆更乞書尾蘇州詞

次韻子紹九日杜門

晚吹悲落葉微雲淡秋陽幽花趣佳節綠酒生寒光秋
物誰可人木奴半青黃想當持兩螯與客薦一觴未須
落烏紗著屐登上方池邊木芙蓉亦足醉流芳醉輒遣
坐客醒復翻書囊心遠門常開足適屨可忘念我安得
此用卧秋日長衰年迫蹇岕病力難取勦昔與羣少年
登山名跳梁醉中看茱萸尚憶故態狂歲月挽不留老

大徒自傷但念拜東野相從日尋常

紹興十九年秋九月丙戌皇帝以太師益國公

像御製贊文稱載勲德命祕書省珍藏小臣

備員史館獲預榮觀再拜稽首賦詩二十韻

上進

真人乘六龍垂拱御八極日月一照臨乾坤盡開闢向
來草昧初廟議資玉食當時無遠謀從事日鋒鏑維師
有尚父端拜奏奇策投戈休五兵執玉朝萬國展家禮

文閣

勒功歸帝籍異報旌殊猷聖意益烜赫御府傳丹
青金匱秘東壁天語粹堯謨宸奎明寶墨想當緘錦囊
喜色動咫尺伊誰蒙此恩從古所未識在昔聞商宗良
弼夢天錫惟肖得形似審象勞刻畫凌烟與雲臺輔佐
亦努力辛勤入圖畫文字紀功德何為得斯名徃徃盡
兵革安能不戰勝有此曠世跡誰持雲漢章雕鏤付金
石千秋事明主萬世垂典冊

次韻子紹同黃超然諸公山中之作

人生邱壑意徃徃老未決煌煌金朱人何嘗樹風烈轉
戰作蠻觸肝膽殊楚越晚為林下遊如熟就炎暵不知
誰爾嗔自欲作此孽諸郎名坐曹十日忽已浹竹輿走
駸駸山溜隨活活青山不相違相見兩欣悅共賦臨清
流班荆坐林樾誰持步兵酒相救文園渴風嘯蘇門登
衣飄御風列問酒掛百金登高扶九節况乃落星巖似
與世人別尚想儋州翁清詩散飛屑遺跡倘可尋斯遊
未宜輟偉哉二三子風姿各磊落應憐老病足無用飽

芻秣那得嘶北風長歌唾壺缺眼看磊落士抗論自起
拔各鳴白玉珂共上黃金闕笑我不出門與世無乃拙
長鬚夜光持清澹兩奇絕咀味久益寒牙類貯冰雪誰
當笑我起着鞭追往轍同乘一葉舟共載西湖月

送王彥猷歸淮西

不食濡須塢口魚只今已是十年餘我猶足馬隨人後
君亦華巔與世疎此日又分直館祿幾時來讀道山書
梅花莫付長安使行卜昭亭嶺下居

子紹許分雙井茶未至

睡眠昏昏睡不開
可憐辜負小窓梅
須煩雙井一杯雪
喚取竹坡春夢回

子紹分以雙井以前韻為謝

雙井甌翻雲脚乳
孫郎詩似臘前梅
更求琢玉敲冰句
要伴茶甘一併回

次韻仲平齋宿慧照

中郎自是廟廊才
平生憂國心如齋
太常章句十二萬

說論不與心相乖周王五禮久不作后夔八音今復諧
君不見周南留滯漢太史夜瞻燿火空興懷朱弦且可
奉祠事盡舸未用思清淮行當入對青瑣闥可但走馬
章臺街持竿我欲釣烟水歲晚黃帽仍青鞵諸公方歲
太平事翁也漫作優人俳

次韻仲平陳郎中孤山見梅用黃法曹舊韻

綠髮朱顏日枯槁心向梅花兩傾倒誰知更有少陵翁
江上情多被花惱三年家住孤山下玉樹瀕湖得春早

山高有月韻最勝水近無風香亦好凌霜我欲念花寒
對酒花應憐客老孤芳一別今幾時更恐山林迹如掃
闕
夢成空遺恨此生常草草醉挽芳條欲問誰
滿挹清樽酌碧昊

次韻陳郎中再賦孤山梅

南枝先回北枝槁玉山誰向花前倒庾郎已老怕愁多
何郎憐花為誰惱今年冬溫得雪遲西湖地勝着花早
舊時處士作詩處籬落橫枝為誰好清霜着樹月滿枝

白雪堆花門不掃
麗句誰能鐵石腸
賴有廣平文獨老
借令一笑有餘妍
賦此新詩不須草
歸尋手種桃李花
痛翦繁枝投有昊

移植官梅已着數花得四絕句

昭文館外無花看
吳樹津頭買樹栽
花本無情天有意
忍寒教為老人開

六尺牆邊滿樹霜
分明不是世間香
黎郎可笑無風味
要把渠儂聘海棠

舊日溪邊醉帽斜玉蕤如雪照烏紗如今欲折疎疎藥
無奈霜蓬不受花

慣作梅花樹底眠老來何事作彈冠詩翁句裏無官樣
只合孤山月下看

郊祀前二日雪

嶰竹吹新陽端門飛晚雪憶隨侍祠官走賀屐齒折簾
垂白玉樓風度蒼龍闕齋殿宿皇輿修廊嚮鳴珥寒風
吹忽散萬象森可閱星言催夙駕天仗含璧月聖心有

忱誠天意有施設誰為白雪歌入奏黃金闕

太倉稊米集卷三十一

欽定四庫全書

太倉稊米集卷三十二

宋 周紫芝 撰

詩三十七首

郊祀紀事十首

并引

歲已巳之中冬十有四日日南至天子親祀
於南郊謀以執事宰屬被旨為外符寶奉璽
玉以先駕十有一日皇帝命出寶函於御府
乃拜受於殿門之外十有二日晨饗原廟夜

祠太室悉奉玉以從十有三日駕幸青城幔
寶幄於端成殿之西廡而宿焉明日乃藏事
於圓丘是夕命朝欲雨而止夜月如晝微風
不搖事皆可書退而紀次得十詩云

內門朝日上金鋪寶玉龍函出殿餘紅燭兩行分御道

輦官三百奉腰輿

奉寶用輦官三百餘人謂之腰輿皆龍燭焚香而前畫故事也

二

內郎進表未平明八玉排行御路平今夜皇輿宿齋殿

九重和氣滿宮城

內侍二人號曰符寶郎是日進表得旨乃奉寶以出

三

曉趨宗廟拜衣冠雲葉低垂護翠纓日采回光天意好

龍顏生喜近臣歡

駕次太廟天意欲雨倏復開霽上大悅

四

班聲催急盡冠裳尚聽嚴更轉警場何事君王虛小次

佩環垂玉立寒霜

上酌獻既降當入小次而不入露立甚久羣臣駭異

五

日照青城瑞色新風微金殿自無塵
麝煤光照烏絲軸

親寫宸章賜大臣

上以原廟之明日作喜晴詩賜師臣稱宸贊弼亮之功

六

水晶簾透月翻光宮漏頻傳夜未央
帝幄微臣亦何幸

侍祠來宿殿西廊

七

紫壇煙煖不飛霜壇下千官列雁行
雪色珠冠光射月

侍祠臣裏識君王

八

清蹕聲中下輦來
景鐘初動八音諧
登歌已奏迎神曲
天步雍容上午階

九

龍麝香從十里傳
繞牆紅燭自生烟
纖雲不度人聲寂
風馬雲車下九天

十

樓上紅鸞扇影寒
樓前宣赦萬人看
清臺奏瑞初呈了

五色祥雲簇彩竿

恭和御製郊祀喜晴詩

聖學淵源貫九邱
雍容元祀得遲留
明庭未款宸心肅
雲馭先回曉月浮
三禮秩宗歸大聖
一言悟主付千秋
已通燿火親祠事
更有何人敢告猷

恭進郊祀慶成詩五首

嶰竹初回律圓丘
始告虔禮應先吉
土誠已格高天上
聖鑄環珮羣公執
豆籩誰為郊祀曲
傳寫入朱弦

二

黃屋登原廟青圭祀泰壇盡循周制度還列漢衣冠扇
影金根靜旂翻豹尾寒近瞻天有喜宗社慶重安

三

百執稱元祀君王服大裘祥光將盛布雨意倏前收月
白明彫俎霜寒肅綴旒欲知天意格盱蟹荷神休

四

聖主翔龍日重熙饗帝時笙鏞陳備樂繭栗薦純犧奠

徹初燔燎神歸欲受釐禮成人共慶廊廟有宗師

五

聖壽三千歲精禋二祀餘天心親道德四海混車書奎
書宸章麗台躔上宰居小臣長拜舞猶得奉皇輿

臘月尾雪意甚濃欸復開霽

曉來豐隆車屢却羲和轍雪意滿江天雲山繞宮闕永
花剪欲墜亂絮飛復歇娉娉臘前梅天寒亦高潔羞隨
小桃枝獻歲取俗悅應留玉樹姿相伴寒江雪含情若

有待此意何由說安得孤山圖畫此兩奇絕

後數日始得薄雪

殘臘不附火冬溫渠堪說身疑在炎方隆冬有餘熱天
公費許力醞此一薄雪草青先得春麥短未濡蘖因風
始空濛着地忽滴歇人生亦復爾過眼倏變滅誰能將
空花認有作嗔悅急須營一杯爛醉梅上月

次韻季共大雪早遊竹閣書所見

憶昔司酒母瀕湖賦官屋頗如賀知章上疏得湖曲詩

雖竟坐窮天亦稍從欲三年看飛雪萬嶺琢寒玉有時
橫輕舫不敢唾淨綠但當忍涕洟豈不念安燠是時走
緋衣荷擔晚相逐堅冰鑿涸陰推日在北陸收藏備賜
頒功用等神速歸來閱空庭玉立僵凍木青燈照詩肩
屢作龜頸縮高軒客誰過寒瓮酒空熟只今古城隅回
望蒼山麓崎嶇失巖岫紅腐困饘粥王郎飛曉驂此意
知有屬文懷斷弦悲當倩鸞膠續話客想回舟敲門亦
看竹恨無摩詰手風姿寫幽獨憶君腸九回得意日三

復平日交遊盡如子一夔足他時追汗漫便可擺拘束
人生何自苦成敗碁一局

次韻季共再賦

寒深方閉門雪重忽滿屋誰能起僵卧賴此陽春曲曲
高雖和寡喜甚得所欲心知夜光珠大勝煖花玉歌君
窈窕詞侑我荔枝綠頗疑蝸牛廬忽作駝裘燠窮兒偶
作富貧固不待逐我老況才盡文字羞二陸上水船苦
遲脫手彈驚速寒如蝟張毛癡類烏棲木兒時弄筆手

老欲袖間縮打窓聽悉罕坐睡便清熟瞑想西湖雪已
沒孤山麓那知公是時洗鉢飯僧粥灞橋風雪驢並酌
不相屬政如冠上貂難使狗尾續病骨尚畏寒少待吹
嶰竹春山走倭遲呼客慰窮獨新游亦不惡舊觀疑可
復歡知當有餘飲豈歎不足述作付陶謝囊囊歸自束
相從笑癡兒日暮方生局

次韻季共再賦

住作山中居懶甚不出屋誰知五斗腰須用作鉤曲索

米無如何問舍豈不欲空懷西谿魚紅鱗膾寒玉不知
坐中山修眉為誰綠散裘裹粗繒隨分了寒燠儻忍作
海夫雖臭亦可逐如其不能然未可歎沉陸此事誰當
論唾面恐自速如君秀芝蘭非世閒草木交蓋久已傾
談舌未易縮不知人謂何此念吾已熟年來有新遊妙
語敵嶽麓縣知南屏謙頗為調茗粥何人餘羊羔金帳
意有屬淺斟醉糝糊低唱聲斷續誰同白傳春樓下雪
中竹更題竹上詩傷神想幽獨但恐世間求此樂未容

復況乃籀雲姿自是千里足行看鏘八鸞何止芻一束
應憐老病翁短髮悲曲局

雪中歸坡二絕

天寒歸路雪霏初家近錢塘十里湖烏帽舉鞭誰畫我
固應全似灞橋驢

小窻梅冷一花明卧榻塵空六尺橫多謝去年湖上雪
隨風時到竹坡鳴

時宰生日詩六首并序

太師益國公之壽日天子出御府之珍燕於
其家伐鳴鼉之鼓調雲門之瑟飲以玉醴薦
於天庖以錫公無窮之壽盖有年於茲凡百
執事之在位者與夫州牧侯伯之在遠方者
內自中朝南連閩粵西抵巴蜀莫不長言永
歌願祈公壽以相聖天子之祝皆覃精研思
以吐為霧縠聲繡之詞固亦麗矣彼不能者
將何以復容其喙乎嘗試以天人相與之意

而言之則是若有得於心而應於言者焉往者上詔將作以建公第廳閣層檐上摩丹霄宸奎妙畫爛如雲漢乃取商伊之一德揭精善之美名聖意所在誰不曉然而求天心之所以克享於公者猶未易名也歲在丙寅天子親祠於南郊前事之夕天且大雪翼日豐隆回馭雪止月出星宿清潤天色晏溫人皆異之上心大悅今歲在己巳天子復祀於南郊

陳五輅建龍旂司服獻大裘典瑞秉蒼玉玄
酒在搏大羹實鼎將藏事於圓丘十有二日
庚寅朝原廟天且欲雨陰雲四垂曾不旋踵
倏大開霽十有三日辛卯上次青城日出扶
桑麗於玉闕有司夜舉祠事天高月白纖翳
不陳燿火既通微風不動明日肆大霈於端
門天顏悅豫太史奏瑞黃雲繞日都城稱頌
歡喜一辭咸曰猗歟休哉此吾君相所以昭

格於上穹之效也夫以丙寅之祥固甚顯異
庸庸蚩尤容或未曉後三歲而天顯其靈尤
甚昭著應如影響事若符契天雖不言若與
之端拜而議矣此豈人力之所能為哉然則
向者吾皇之比德於商臣有若蓍龜之前知
百辟羣工目擊意喻萬邦黎庶罔不是孚則
公之信於君可謂深矣抑公之格於天可謂
至矣於是摹寫德容形之縑素歌詠大美刻

之金石而天語粹溫宸翰赫奕海宇流傳一
日萬口皆書契以來所未前聞也追惟前日
扶携老稚流離山谷心口相語初不自意得
見太平之日今乃身遊廟堂和氣之中日覩
禮樂文明之治怡然相與周旋揖遜於俎豆
笙鏞之間亦已幸矣則其伏拜於公堂之下
以獻區區之祝為不可後也擬古風六首質
而不華俚而不經前不足以攀古人之轍後

不足以躡疇人之蹤固不敢吟蹕而前至於
迷聖意之所歸明天心之是格其事迹昭著
若諄諄然有言以命之則敢謂庶幾焉謹序
后皇開玉堂仙官儼成列奕奕峨長纓珊珊鳴珮玦中
有一真仙容華燦冰雪維時值中原格鬪彌歲月帝命
下撫摩聊用究施設王綱墜莫舉獨以一手挈至言等
藥石黔黎盡生活帝曰伊誰能何以報殊烈爵之白玉
漿奏以雲門闕徘徊上璇穹千秋拱雲闕

二

軒皇出御世垂拱坐法宮時聞康衢間處處歌兒童霓
旌旋羽蓋問道來崆峒天師廣成子道實與帝同一言
忽相契四海俱同風天師初何言涿鹿未為功蓋以清
淨福下決寰區中君臣俱好生自然格蒼穹天道本好
還報以歸其躬一千二百歲此壽何由窮

三

南山一何高山高亦何有上有摩霄松蒼虬立盤糾下

有千歲芝食之令人壽挽之為天樞循環轉維斗紫宸
傍七星坐閱幾晚晝帝以殿厥居山龍垂袞繡后皇植
巨木載物見坤厚用以搏洪鈞功乃周宇宙才大用固
難德盛功亦懋社櫟其何顏繁柯日滋茂

四

鳳管吹新陽夙駕歛寒谷鑾車次原廟陰雲立紛覆皇
天倏開霽義馭亦返軸明庭朝百靈雲韶奏新曲天神
下璇穹精意儼森肅霜華潔彫俎夜寂響鳴玉燎烟升

紫壇龍旂護黃屋齊明坐宣室
盱蟹來萬福大沛均四方穆穆
熙庶俗熟知廊廟功一德天所
燭

五

晏嬰昔事齊頗作君臣樂魏絳
欲安晉賜樂乃備作區區二小
國功利亦云薄舜德本好生臯
夔坐酬酢朱干舞堂陛綵鳳翔
寥廓大哉廊廟功禮文燦交錯
登歌奏郊社率土被和樂仁聲
淪肌膚有識自忻躍四海悉歸
仁大信初不約不拍洪崖肩壽
亦等山嶽

六

太極肇兩儀君臣亦爰分風后力牧來於今幾何人中
古稱伊周當代知無倫公功出其上未易今昔論功固
未易論報亦難具陳傑閣標盛德備燕昭庸勲丹青繪
黼素奎畫形絲綸凌烟古亦有茲實所未聞何勞不羅
拜金猊祝爐芬永相天自許耆壽尊師臣

次韻子紹臘雪書事

君莫愛廣寒殿冷月姊歸夜乘白鳳空中飛何如長安

城中千門萬戶雪玉皇后闕人間稀明年王春月書正
瑞表垂黃臘前闕衮衣丞相穆天綈白髮野人歌聖政吾
生老矣直宜休此心欲話誰當酬短犁青帽耕雪壟破
曉何時歸飯牛誦君新詩如七發酒酣起舞耳亦熱滿
夜方伴月嬋娟開戶不知風凜冽

元日三首

八風占歲暖先催喜色還從太簇回庭下衣冠天咫尺
雪中宮殿玉崔嵬

去年殘雪在樓臺日上黃簾禁殿開白髮小臣揩病眼
誤隨雲氣到蓬萊

三尺金猊暖御爐黃麾枝下奏番書喜看萬里朝元使
又上今年第一魚

春意二首

客思知多少衰年倍感傷寒猶噤鳥語雨不聽花香去
路如天遠春愁著斗量擬拋彭澤印掛席上歸航

二

雨細無多子雲間又夕陽鳥呼高枕夢花醉老人腸倩
酒推愁去憑詩伴日長王孫歸未得草色自東牆

寒食病起二絕

桃花落後燕雙飛三度清明換客衣猶有江南故鄉夢
起尋楊柳插朱扉

異鄉多病復誰憐怕見清明二月天雪白吳兒解歌舞
羨他携手上湖船

太倉稊米集卷三十二

欽定四庫全書

太倉稊米集卷三十三

宋 周紫芝 撰

詩六十五首

病起借季共筒字韻呈相之季共

樽前風味笑衰翁
病起飛蓬一半空
春與落花何處去
醉如霜葉不成紅
一生渾作邯鄲夢
九載香吹嶰谷筒
老去新愁尚無數
却須分向酒杯中

再用筒字韻呈相之季共

柳邊輕絮不禁風春事如梭過眼空已有細枝催暗綠
忍看疎雨打殘紅強將瘦馬敲烏帽只合秋江把釣筒
賴此同遊兩陶謝詩成渾在笑談中

再用筒字韻呈相之季共

似僧寮外看春風晏坐尋詩不寫空春事可憐樽酒在
旅情猶念舞衣紅去家久似千年鶴時節看沉五綵筒
節物苦催雙鬢白故鄉常着夢魂中

恭進奉安中興聖統慶成詩二首

歡聲何事入康衢
邃殿功成聖統初
欲卜萬年新厯數
重看四海舊車書
韶奏樂來天外寶
冊鳴鑾上帝居
合與典謨垂奕世
渙溪文在復何如

禮行廊廟喜書成
重比商周說中興
九葉承家傳鳳厯
六飛當位紀龍昇
人將堯禹方勤儉
天付蕭曹作股肱
擬為中和歌樂職
小臣蕪陋亦何能

送守寧道住顯忠菴

報恩席止三千衆
錢氏菴頭六尺床
今日道人無舊夢

開門打睡不開堂

謝吳司戶寄詩卷

萬里來西極龍媒定不疑人應如此少老恨識君遲
白璧元無價青雲未易知小低湖海氣安穩過天池

故國雲山夢長安白首郎病眠三日雨門靜九衢坊別
後誰傾蓋書來喜失床愛渠詩似玉應用錦為囊

春晚偶題

春與桃花作伴歸不須更著雨頻催簾垂盡日無人處

柳送晴天落絮來愁裏酒杯誰共把眼前書葉懶重開
那知造物憐幽獨忽遣啼鶯喚夢回

食生荔子五首

五嶺人誇荔子珍老翁何事始嘗新憑君試擘輕紅看
不帶開元一騎塵

著枝猶有露華腴誰把紅紗罩玉膚龍眼也隨君並熟
一生空作荔枝奴

小隊將軍過五溪相看猶作夢中疑回頭欲問罨摩勒

乞得微甘是幾時

瘴嶺蠻村萬里賒可憐生不近京華荔枝猶想南中樹
末利先看近世花

東來坐見玉肌豐識面中郎舊譜中絕勝詩翁紅萬顆
暮年流落到瀘戎

季共見和詩次韻為謝

當日梨園壽太真荔枝香曲賜名新麻姑萼綠雙回袖
舞徹遙知不動塵

禁中分賜盡甘腴
璇璣壺水積雪膚
聞道風流黃閣老
長鬚遺送玉川奴

人把江瑤比荔枝
枇杷檮棹更何疑
枕椰葉外和烟樹
想得青紅半熟時

樽前風味要人誇
瘴雨蠻烟度歲華
乞得水晶三百顆
綢紅時看眼生花

霧縠囊懸小樹紅
芳香應入笑談中
世間絕韻須真賞
人物當先數阿戎

季共聞余賦五詩猶未之見以三詩見索因次

其韻

閩嶺今年荔子遲生枝入眼可無詩誦君勝句須銜璧
老將何由更出奇

夢對清樽看玉山荔枝空嚼水中寒心知不與公同味
始信人生一笑難

揚梅盧橘自成雙敢與冰紈作雁行莫怪老翁頻著句
書生說食是膏肓

米元暉待制歲以賜冰及荔子分遺季共而今
年荔枝不至有詩次韻

詩老盟成恐未寒今年荔子不同餐空排白玉千峯雪
却憶紅砂九轉丹

銷得鑾坡荔子香玉郎言語似君房金盤何日分新果
五線先看補舜裳

醉墨猶多御府珍訪求公後出華勛知君家有荔枝帖
不減當年王右軍

謝陳仲襄主簿惠詩卷

霜雪頻欺老芝蘭日鬪芳官猶似仇覽句擬學韋郎郊
島無前輩曹劉可雁行他年尚相見此地必升堂

李太白畫像二首

欲與天仙論等差短長何止但詞華誰人解屈將軍手
為脫烏皮六縫鞢

少陵詩瘦平生苦太白才高一醉間投得江心波底月
却歸天上玉歸仙

李共置酒酒間出龍眠數馬以示坐客最後出
起雲妙甚為賦長句

君侯酌客黃金杯六龍下食慈明催醉開畫苑出天馬
遠自大宛西極來起雲礪礪最後出真龍八尺高崔嵬
青天欲雨雨未作怒雲潑墨烏成堆長鳴自怪兩耳立
路轉欲從雙鐙回王良造父眼未識驂騑驪天與才
朝從燕代暮南粵萬里一息何遼哉公今此畫何處得
外家中郎李公客人間英物有護持世上丹青少顏色

雙花蜀錦青絲囊還公此畫公須藏天寒夜半黑風起
邂逅恐逐飛雲翔

季共蔡天啟得此馬於伯時

韓幹畫郭家師子花此畫本江南故物自腕而
下絹素爛脫李伯時得之馬忠肅家補足之
蔡天啟貌本以傳其甥王季共

神駒墮地無渥洼象龍不復來流沙開元畫手老韓幹
為作郭家師子花當年故物不堪看踣鐵四蹄俱脫腕
英姿逸態猶精神彷彿風鬣血流汗龍眠盡足不盡蛇

意象異世同一家由來四大各假合得此三昧無等差
中郎名高自年少畫工如山不同調人間意氣驚薊雲
筆下風流爾得妙王家人物小安豐作詩論畫公所同
一洗萬古凡馬空九原誰喚杜陵翁

季共以師子花見借作詩歸之而報甚寵且言
隆近為余作數馬奇甚乃作此詩以見願借
之意

畫史俗士非畫者支郎好馬能畫馬為君肯作數驂騮

班郎應歌天馬下前人妙筆俱絕倫後人骨冷喚不聞
試借雲衢千里足洗我眼中凡馬羣

隆高僧

季共以隆師四馬見示後三日作長句以歸之
少陵說馬誰擅場老韓曹霸江都王只今傳法誰得妙
支郎為藝龍眠香沙平草細春日長何人識此真乘黃
歸君蓬齋君卷藏似君千里方騰驤

次韻相之木犀六首

拂色青衫不是粧藥珠宮裡淡鶯黃紫羅裳亦元無用

蒼蘂花應自有香

高樹層陰作翠雲
月華霜暈醒餘薰
人間韻少花俱俗
天上香來世未聞

西湖南北兩邊山
牢落孤芳不奈閒
好遣長鬚挽黃粟
付他桃葉伴雲鬟

故國幽姿想自妍
只今誰與著詩憐
竹籬茅舍花開處
望斷江西眼欲穿

留香欲住正須陰
遠引山林却要侵
絕韻有誰能畫得

郎潛詩妙最知心

玉折蘭摧事已休，倡條無數綠陰稠。
此花獨與蒼巖桂，風雨平分萬壑秋。

次韻呂晦樸九日見示

敢乞蘭金作詔泥，年今已是古來稀。
一天細雨家何在，十載黃花客未歸。
萬事可憐俱老境，故人猶欲借餘暉。
但當洗眼秋風裡，飽看雲鵬作意飛。

次韻陳簿席上見和

黃鵠摩霄未易知倦飛寒雀本來卑頗慚陶令歸田早
政坐穰侯見事遲偶有酒供鸚鵡舞苦無人唱鷓鴣詞
秋來湖上山方好食蛤重為汗漫期

河伯小史白事歌

馮夷宮中地無土五更排衙朝擊鼓大官擁旆呵馬歸
小史白事當前語自言賦命頗奇窮一生自足風波苦
船須把纜始敢放霧可藏身亦時吐吐防危慮患豈不至
徃徃不知遭網罟河神笑謂小史言禍福不計愚與姦

恢恢天網自不失瑣瑣爾曹何足論小史速退卷舌走
顧視儔列圖前奔

峽守秦德修楚塞樓成索詩為作長句異時魯
直遷涪江過之命此名且書牘今亡矣

使君才氣號無雙千騎新來綰漢章此日樓臺新楚塞
當年翰墨記黃香民安樂歲州何事江入清樽客滿床
十二巫山應在眼定無遺事說襄王

淮上聲名徹冕旒幾年邊鼓卧清秋五花未從甘泉駕

百尺聊新楚塞樓暮雨已隨烟珮去長江空抱峽山流
客來欲吐窓閒句莫把城南比閬州

題蘇養直像三首

先生初出後湖時日落山寒醉不知更上蹇驢何處去
灞橋風雪要渠詩

名滿人間未足多胸中萬頃著烟波松江風月無人見
誰與玄真畫釣蓑

水上柴扉閉不開蒼山羔雁九天來玉京已有神仙籍

莫怪青山喚不回

十月九日霽色可喜

屋角梅花欲弄晴耐寒庭草尚晶瑩護霜雲重知何事
留得芭蕉作雨聲

朱門深閉得香多曉日烘簾氣自和此地有窓無一席
固應宜著病維摩

江上南枝暖欲妍小春時節又經年誰知一點還鄉夢
直到梅花樹子邊

次韻季共蓬齋新梅

王郎巧催花妙語起槁枯譬如返魂香能使死者蘇詩
成花亦開小草時卷舒頗如風前柳勝韻花中無蓬齋
姑射仙不待折簡呼芳姿倚醉玉未用須人扶自君作
周旋此德良不孤移根始山中一笑煩王都坐令桃李
花淺俗皆凡夫隼几滑以淨雲窻窈而虛醞白奪寒雪
軟紅空九衢我久離山中問花今何如殷勤培弱幹何
日課獠奴於花苟得計於我亦何愚此意倘復遂瘦地

良可鋤誦君種花句撫卷長嗟吁

聞朱虛真請老二首

平生恨未識朱游每得清詩慰客愁
泛宅清苔真得句掛冠神武更何求

久厭朱袍裹玉仙幅巾藜杖老山間
從今魚鳥緣應熟

只恐鴛鴦債未還

朱作長短句有道人還了鴛鴦債未還之句

次韻范元卿題友山堂

人間南北無同異四海蒼生俱一世
借令賣友取封侯

一擲成廬亦兒戲東平風度人所難不將白眼看青山
少年結客知無益老喚南山相與閒人情自是有新故
相好乃能保朝暮故人落井已下石紅袖彈箏未移柱
玉巒排秀天清明亂峯入眼心先傾向來刎頸或蹀血
此地一笑終忘形平生愛山心願見喜色津津應滿面
寧愁偃蹇不受招一鶚孤飛誰可見

無住菴主為余寫真報之以詩

驂騑田絕足韓幹真畫者儻欲萬口傳當畫千里馬吾

才如跛鱉子不解騰跨初無繭雲姿何勞人摹寫支郎
妙人物名聲遍日下事苟不當急操筆有用捨一逢松
韭翁終安陋樸野無鹽元自醜強欲相紛赭至技不可
名厚意徒久假我欲報之詩有作非大雅

孤山之顛舊有開氏四照閣次年部使者獻西
湖圖神廟閱圖久之問開氏四照閣安在部
使者失對其知名如此昨跋馬過下山見赭
衣荷鍤數百人問之則軍中藏冰於此也

出頭傑閣想崢嶸當日佳名達裕陵豈料生存華屋處
將軍於此窖寒冰

次韻相之見進口占雪中新句且許約季共携

山谷書伯時畫過敝廬

寒欺玉樹雪橫斜遙想諸郎擬玉華

玉華鹽名
出金樓子更借蟾

蜍千里月細看簷蔔一林花公名已在曹劉上我輩裁
堪屈宋衙聞道高軒開二妙竹坡猶有雪煎茶

次韻季共和相之前作二首

誰從玉闕蓬萊殿吹下仙人萼綠華風急有時翻柳絮
月寒無數著梅花時開病眼看三徑勝着青衫趨兩衙
欲煮南屏山下雪問誰能點老謙茶

雪意鬢鬢整復斜似人霜髻不勝華只今瘦骨敵風帽
空憶寒江釣浪花妙舞正看回激楚兩峯旋欲戰彭衙
不將鹽絮輕相比似我南窓玉色茶

寄題張常州烏墩新作濯纓亭二首

使君如冰壺不受古俗塵何為解多冠濯髮天地津開

門納滄波自與雲水親
知誰分清流照此千載人

二

濯纓須滄浪彈冠必新沐
昏昏不可受皓皓亦易辱
借令困一塵未易浣冰玉
勿從漁父談恐自成窘束

送孫求仁官黃岡

黃岡古淮邦其大不如斗
誰知隔岸山萬馬日奔赴
有數着詩人此地實林藪
頃來當盛年王公號賢守
三年江上杯快飲竹樓酒
東坡營雪堂始種坡前柳
至今有

遺跡過者為回首後來老門生

張文潛嘗
謫居於此詞翰玉堂手

謫官茅三間門巷無鷄狗孫郎飽文藝貧病亦已久著
履知有土捉衿乃見肘抱經官殘州一飽亦難偶論文
有餘日為我訪白叟遺事倘可書尚足寄衰朽慎勿止
寒溫作書問安否

謝吳司戶寄春陵四首

何年山嶺崑化作龍起伏安得挽天河著龍吐飛瀑

二

往穴城南窻分山得遙碧誰持列玉峯來照蝸牛席

三

吳山非不佳故山終眼明南來一拳石似我小崢嶸

四

孤峯真崛竒凝目見太古便悲江上山培塿不足數

太倉稊米集卷三十三